



Gaza alizüksü atema US temulungtetba nung lir: Trump

Ireland-i run 63 agi Zimbabwe kokogo

VOL. XXII ISSUE NO. 118 (ADOK 119) DIMAPUR SANGTENNÜ (TUESDAY) TSÜKLAI (FEBRUARY) 11, 2025 ₹ 5.00

Foothills Road atema NFHRCC den Implementation Agreement nung sign asütsüla

Dimapur, February 10, 2025

(TYO): Ali kiburtemi sen poisa ka dang magiba, Naga yimten teloktemi Tax kecha memeshiba aser Kin Hohotem temoatsü kübok iba mapatong atonga inyakba ajanga Nagaland Foothills Road ya mapatong khenyongi balaka mesüra nübortem mapatong ta züngshir.

Iba tangatetba nung ajemdaker Nagaland Foothill Road Coordination Committee (NFHRCC)-i kanga dang meranga inyaka arur saka tang parnoki Implementation Agreement sign sütepba nung tetsükdaktsü ka ajurua aliba atema sangdong ka nung osang tejangja metetdaktsüogo.

Iba atema NFHRCC-i PWD (R&B) aser bangdak department dang Implementation Agreement nung sign mesüi aliba contractor temi sign asütsü aser mapa inyakba mongpu matemdang mapa tenzüka inyaktsü tetuyuba agütsütsü mepishio.

2013 küm bangdak department-i Committee nem Foothills Road yanglutsü atema contractors bushitsü mapa lezmüksü. Iba sülen department-i contractors nem work orders agütsü. Kasaji 2024 nung inyak aser Tuli Division nung earth work atema M/S S3 INFRA,

Jungthu River, Baghty Division nung apu yanglutsü atema M/S QUINKER ENTERPRISES, Sungkhatchu River, Baghty Division nung apu yanglutsü atema M/S MHA-TUM & CO aser Tsumang River, Shanthatchu-Liphi Junction, Baghty Division nung apu yanglutsü atema M/S PELLE KHEIZE & CO nung nem work order agütsü. Parnok ajaki Committee den Implementation Agreement nung sign sütepba sülen mapa tenzüka liasü, ta NFHRCC-i ashi.

NFHRCC aser Nagaland Chief Minister külemi inyakba den Nagaland Governor-i tebang aitba ajanga iba mapatong ya Special Assistance to State for Capital Investment (SASCI) kübok dendaktsü. Iba nung ajemdaker PWD (R & B) department-i December 12, 2024 nü Rs. 148.5 Crore indang work orders 17 agüja liasü.

Iba ya SASCI kübok 1st Phase atema liasü aser (1). M/S Medodi Construction & Co. (2). M/S N. Chisho Swu & Sons (3 work orders) (3). M/S T. Albert Angami & Co. (4). M/S P. Mha-Tum & Co. (5). M/S Quinker Enterprises (6). M/S 3S Infra (7). M/S Yanna Enterprises. (8). M/ S. A. Pongshi Phom & Sons. (9).

M/S. Shangpoh Konyak. (10). M/S. Onkho Construction & Supplier. (11). M/S. Ren Kik-E.Z.J & Co. (12). M/S. JK Construction (2 work orders) (13). M/S. Chabou & Co. (14) aser M/S Pelle Kheize & Co. nung nem work orders agütsü.

NFHRCC-i inyaka aruba ama December 17, 2025 nü work order lezmüksü teloktem den Implementation Agreement ka nung sign sütepstsü atema jaok. Work orders angur 17 nungi 9-i Committee den Implementation Agreement nung sign süteper mapa tenzü.

Ajisüaka, (1). M/S. Yanna Enterprises. (2). M/S. A. Pongshi Phom & Sons. (3). M/ S. Shangpoh Konyak. (4). M/S. Onkho Construction & Supplier. (5). M/S. Ren Kik-E.Z.J & Co. (6). M/S. JK Constructions (2 work orders) aser (7). M/S. Chabou & Co. nungeri Committee den Agreement agiteptsü memulung anungji parnok nem December 21, 2024 tashi mapang agütsüsem saka idangjia sign mesütep ta NFHRCC-i ashi.

Committee züngsemtemi parnok den ajurutepe Agreement nung sign asütsü mepishi saka parnoki tashi manga, iba jagi January 16, 2025 nü NFHRCC-i

Ao Senden, Lotha Hoho aser Sumi Hoho den senden ka amen aser M/S. Ren Kik-E.Z.J & Co., M/S. JK Constructions, M/S. Chabou & Co. nungeri January 20, 2025 tashi nung sign süteptsü aser aji ta mesüra work order agientsü telemtetba agia liasü.

Maneni, Committee-i January 19, 2025 nü Phom People Council (PPC) den ajurutepe senden ka amen aser M/S. A. Pongshi Phom & Sons dang January 23, 2025 matongdang Agreement nung sign süteptsü mesüra work order agientsü ta mepishia liasü.

Committee-isa January 23, 2025 nung Konyak Union (KU) den ajurutepe senden ka amen aser idangji M/S. Yanna Enterprises, M/S. Shangpoh Konyak, M/S. Onkho Construction & Supplier nungeri Agreement nung sign asütsü atema KU ket nung agütsü.

Külen, M/S JK Construction aser M/S Chabou & Co nungeri January 20, 2025 nü Committee ket nungi Agreement meshi saka January 26, 2025 tashi nung magütsü. Anungji Committee züngsemtemi M/S JK Construction Proprietor Dr. Dr. John den par kidang ajurutepe aser angateta jembiba sülen Dr. John-i par jabaso den jembiteptsü ta

ashi. Ajisüaka pa nungia telangzüba kecha mangu nung Ao Senden, Lotha Hoho aser Sumi Hoho-i JK Construction, M/S Chabou & Co aser M/S Ren Kik-E.Z.J & Co. jaoka liasü.

Ajisüaka, senden nung adenertemi mepishiaka Dr. John-i senden nung medeni oadok anungji pa ama tashitemeter kati yimya tamajung beshiba ajanga Kin Hoho aseme Lotha Hoho nem anogo pungu tsüngda bangdak contractor tem den teinyaktsü tim inyaktsü mapang züngzüksü. Iba senden nungsa Committee den agreement nung sign masürtem nem mapa inyaka moudaktsütsü bangjemtep.

Iba atema PWD (R&B) Minister-i February 7, 2025 nü Kin Hoho 12 jaok aser Agreement indang jembitepe saka Agreement nung metokmeperi kecha majitet aser department-i tekaratiba nung Committee den ajuruteptsü jembitepe ta NFHRCC-i sangdong ka nung ashi.

Parnokisa Minister aser bangdak department dang Implementation Agreement nung sign mesüi aliba contractor temi sign asütsü aser mapa inyakba mongpu matemdang mapa tenzüka inyaktsü tetuyuba agütsütsü mepishia metetdaktsüogo.

NSCW-i Hutoshi tepsetba khukhua aitsür

Dimapur, February 10, 2025

(TYO): February 9, 2025 nikonkdang Thilixu yimtsüng nung Kughato Yeptho-i pa kinungtsü Hutoshi tepsetba khukhua aitsür ta Nagaland State Commission for Women (NSCW)-i metetdaktsüogo.

Tetsürtem dak iba ama taochi maliba mapa inyakba ya magizüker aser ozüng tesashitiba agi merenshitsüla. NSCW Chairperson-i tuyuba ama Commission-i iba tatalokba süoki ia bilemer aser Commissioner of Police, Dimapur dang tekaratiba nung bushisüngdang temeten

agütsütsü shidi ka zülüogo.

Deobar nikonkdang Chümoukedima district kübok Thilixu yimtsüng nung arishi küm 40 tain , Kughato Yeptho-i pa kinungtsü Hutoshi (36) tepset.

Tena ya ita ana asem ka tejakdang dang kiyimba kulizüng agia liasü aser kinunger ka kidang liyonga aru ta osang angazüker.

Deobar nikonkdang 3:00 ako meta tena obang meputep adoka raratep aser idangji Kughato-i la kinungtsü leplet. Iba sülen pai pa sasa Diphupar Police ket nung bendanga agütsü.

Mokokchung DC-i Travel Advisory ka agütsür

Dimapur, February 10, 2025

(TYO): Mokokchung Deputy Commissioner Thsuvisie Phoji-i Travel Advisory ka agütsüogo.

NH 202 nung Tsutsung apu yanglushiba ajanga iba lenmang

nung gari senzisenbongba ajak anena atar ta DC Phoji-i ashi.

Iba jagi Longsa - Suruhoto - Yangli - Tuensang - Longmisa - Alisopur - Tronger lenmanglen senzütsü metetdaktsür ta paisa ashi.

DoSE-i tesayur 1,372 mapa belener

Dimapur, February 10, 2025

(TYO): Directorate of School Education (DoSE)-i Primary Teachers 840, Graduate Teachers 341 aser GHT & UGHT teachers 191 tashi mapa melenshiba metetdaktsüogo.

DoSE-i ashiba agi iba atema TA/DA magütsütsü ta ashi aser iba sangdong agütsüba sülen

anogo 7 tsüngda tesayurtemi pei lezmüksü tesem nung mapa tenzüksü tetuyuba agütsüogo.

Tesayur shinga retention mesüra reconsideration masütsü aser sangdong nung ashiba ama mapa meinyaker indang itasen sota atatsü ta Principal Director, DoSE Thavaseelan K, IAS-i metetdaktsüogo.

Kevileno Angami-i tanur asüidang nungi renemtsü ayongzü



Kohima, February 10, 2025

(TYO): Tanur asüidang nungi academic exams atema dang masü saka tekolok renemba mapa tenzüksüla ta Nagaland Commissioner Secretary for School Education, Kevileno Angami-i ashi.

Prime Minister'er 'Pariksha Pe Charcha' nung shilem ka ama Dr NK Government Higher Secondary School Kohima nung kaketshirtem den jembidang lai iba ya ashi.

Tatidang indang khuret ya tuluka dang saka taküm nung khuretem aser tayongzükbatem atema renema alitsüla ta Kevileno-i ashi.

"Asenoki tatidang atema dang masü saka taküm liyonga aotsü atema renemtsüla. Asenoki taküm lia aodang tayongzükbata, tenokdangba aser khuret aika ajurutsü, saka item ya koktettsü lenmangtem lir" ta lai ashi.

"Taküm nung tayongzükbata aika ajurur saka asenok ibaji asen inloktsü atema maongkatem ama züngshitsüla. Tangatetba tajung ayu nungbo shisaliok aser taküm nung tayongzükbatem kokteta dang aotsü" ta Kevileno-i kaketshirtem ayongzü.

Prime Minister Narendra Modi'er "Pariksha Pe Charcha" program ya küm aika takok nung

agia aruba atema tenüngsang agütsür ta laisa ashi.

Iba sentong nung Prime Minister Modi aser kaketshirtem sensaksemba school balala nung live stream süa sayua. Iba mapa ya Directorate of School Education, Nagaland-i tuyuba ama department ketdangsürtemi achaayanga agia liasü.

Külen, Nagaland Board of School Education (NBSE)-i Mongulbar nungi tenzüker March 5, 2025 tashi High School Leaving Certificate (HSLC) aser Higher Secondary School Leaving Certificate (HSSLC) Examinations 2025 agütsü.

State nung BJP legislature temi meranga inyaker



Dimapur, Tsüklai/February 10 (TYO): Delhi nung tawa agiba Assembly elections nung Bharatiya Janata Party (BJP)-i takok anguba ajanga Nagaland nunga party tashi ishitsu teimla lir.

Delhi nung takok anguba benjonga Dimapur District BJP ajanga tenüsang agütsüba sentong ka Hombarnü ayongzüka liasü.

Osangbener den jembidang, ibai Nagaland aser India tesem ajunga nung BJP asoshi anogo tajung ka lir, kechiaser Delhi nung küm 25 sülen yimsü asütsü jenjang alangtetogo, ta district

BJP tir Shekiske Achumi-i ashi. Delhi election results ajanga state nunga party tashi itshitsu imlar ta pai ashi.

Political party mashi ka atema Delhi ya mitsa amai lir aser Delhi Legislative Assembly nung BJP-i yimden aniba ajanga tarutsü nung Nagaland nunga party tashi itshitsu, ta pai ashi.

Nisung ajak tangatetba balala lir, saka BJP ya cadre nung amendakba party ka lir aser nübur tiyong südaktsür, ta Dimapur district BJP tiri ashi.

Anungji BJP nung lenirtem aser workers temi meranga

inyakba yong Delhi Legislative Assembly nung tashi agitet.

Nagaland nung taoba Assembly elections mapang nangzüka ama BJP-i inyaker asü, ta asüngdang dang, nüburtem dang nangzüka parnok kümsük matemdang inyaktsütsü asoshi Nagaland nung BJP legislators temi meranga inyaktar, ta Achumi-i ashi.

"Asenoki repranga atati, aser nübur ajangzüksü mapatem inyaktsü aser Nagaland nung BJP ola tuluba akumtsü asoshi BJP legislature temi inyaktsü ni amanger," ta pai ashi.

Kohima district nung Block-Level Aadhaar enrolment tenzüker

Dimapur, Tsüklai/February 10 (TYO): Kohima District kübok tesem balala nung Block-Level Aadhaar Enrollment and Updation Camp alitsü, ta Deputy Commissioner, Kohima ajanga sangdong ka nung metetdaksü.

Tanurtem tenüng züluoktsü, mobile number update asütsü, demographic updates aser biometric updates asütsü nükjidong nung iba sentong ya Regional Office, UIDAI Guwahati-i melaogo.

Camp ya tsünglanglen agüja

aliba tesem aser anogo nung agitsü:

1. February 11, 2025: VDB Hall, Ziekezou, P. Khel, Kohima Village.
2. February 12, 2025: Panchayat Building, L. Khel, Kohima Village.
3. February 13, 2025: Chede Model Village and Chedema.
4. February 14, 2025: Don Bosco Higher Secondary School.
5. February 15, 2025: Mount

Carmel Higher Secondary School.

6. February 18, 2025: Jotsoma Council Hall.
7. February 19, 2025: Sechi Zubza Council Hall.
8. February 20, 2025: Jakhama Town Hall.
9. February 21, 2025: Kezoma Council Hall.

Iba enrolment aser updation inakyim nung blocks kübok sorkar kaket reju tema shilem agitsü, ta sangdong ajangasa ashi.

Kohima-Mokokchung Transmission Line test charged asütsü

Dimapur, Tsüklai/February 10 (TYO): Er. Namheukhate Zeliang, Executive Engineer, Transmission Division, Kohima ajanga sangdong ka nung tsünglanglen shia aliba yimtsüng aser jila ajanga aoba "220kV S/C New Kohima-Mokokchung Transmission Line" ya February 12, 2025 anügdang 11:00 ako nung test charged

asütsü aser iba sülen charged süa alitsü ta metetdaksüogo.

Iba transmission line ajanga aoba yimtsüng aser jila tem - Zhadima, Teichuma, Botsa, Tsiemekhuma, Tseminyu, Nsunyu, Tesophenyu, Ehunnu, Terogunyu, Tsaphimi, Kitami, Settsu, Alichen, Longkhum, Ungma, Sastami, Ajiqami, V.K Town, Maromi, Phisami, Izheto,

Mukami, Philimi aser Shena Old alitsü.

Anungji nüburtem dang iba transmission line nung mokongshitsu mesüra anasa maotsü metetdaksür. Shibai yamaji inyakdir, pei khuret asütsü aser Department of Power-i kecha khuret magitsü, ta sangdong ajangasa metetdaksü.

Mon Town nung Career Guidance Seminar agitsü

Dimapur, Tsüklai/February 10 (TYO): Eagle crest Skill Training Institute ajanga employment den sendaktepa career guidance seminar ka Classes 10, 12 aser college final year azünger aser zünger mapa mongui alir asoshi Aviation, Hospitality, Tourism, Cruise line & overseas recruitment atema March 6, 2025 anügdang 11:00 ako nungi tenzüka Town Council Hall, Mon Town nung ayongzüksü, ta Deputy Commissioner, Mon, Ajit Kumar Verma, IAS ajanga sangdong ka nung metetdaksü.

Jangra alirtem ajak arua iba sentong nung adentsü ayongzüker, ta sangdong ajangasa ashi.

MLA-i MDSC Dimapur semdangtsü

Dimapur, Tsüklai/February 10 (TYO): MLA aser Chairman, Committee on Government Assurances (2024-2025), Kuzholuzo Nienu ajanga sangdong ka nung Multi-Disciplinary Sports Complex (MDSC), Dimapur semdanga

inakyim asadangtsü asoshi February 17, 2025 anogo latetogo.

Anungji Committee on Government Assurances züngsem ajak iba anogo medema adenshia iba tesem semdangtsü ayongzüker, ta sangdong ajanga ashi.

Cultural Research atema application meshir

Dimapur, Tsüklai/February 10 (TYO): Tagore National Fellowship for Cultural Research, 2022-2023, 2023-24 aser 2024-2025 atema temsüa aliba aser jangra aliba nisungtem nungi application meshir, ta Director, Art and Culture, Nagaland ajanga sangdong ka nung ashi.

Jangra alirtemi application

form ya Ministry indang website www.indiaculture.gov.in, Prime Minsters Museum and Library-www.pmmml.nic.in aser <http://nezccindia.org.in/Home/Advertisement> nungi agzüker February 15, 2025 tashinung NEZCC nem agüjang, ta sangdong ajangasa ashi.

Dimapur nung State Handloom Expo ayongzüksü

Dimapur, Tsüklai/February

10 (TYO): The Nagaland Handloom & Handicrafts Development Corporation Ltd. (A Govt. of Nagaland Undertaking) Dimapur ajanga Urban Haat, Dimapur nung March 6-19, 2025 anogotem State Handloom Expo (Hathkargha Mela) ayongzüksü, ta NHHDC Ltd nung Managing Director, Er. Y. Lipongse Thongtsar-i sangdong ka ajanga ashi.

Iba Mela nung shilem agitsü asoshi application ya March 1, 2025 tashi agizüksü, koba Office of the Development Commissioner (Handloom), Ministry of Textiles, Govt. of India, New Delhi ajanga

sponsor asütsü.

Jangra aliba Co-operative Societies, Producer companies, SHGs, Federations, Apex Societies, Handloom & Handicrafts agencies, silk weavers, Jute Artisans aser KVIC temi iba sentong nung shilem agitsü asoshi Project Cell, NHHDC Ltd, Half Nagarjan, Dimapur nem application den address tejangja, Mobile number, Bank A/C No den IFSC code aser stall nung ayutsüba oset külemi tangokba noksa agütsütsüla.

Stall ajak angati agütsütsü aser NHDP guidelines nung aliba ama Lumpsum TA/DA/ aser Freight charges agütsütsü, ta sangdong ajangasa ashi.

Mokokchung & Kohima nung National De-worming Day tenzüker



Dimapur, Tsüklai/February

10 (TYO): Mokokchung nung District Level National De-worming Day round mezüngbuba February 10, 2025 nü Government Middle School Mopongsen, Merangkong nung tenzüker, koba Mokokchung District kübok schools, AWCs aser Health Units ajunga nung agiyonga aotsü.

Iba sentong tenzüker mapang Dr. Suimzenla, MO (Ayush) ajanga parasitic worms agi temang nung kongshiba, mürekmeja alitsü aser anepaluyim indang kaketshir aser tesayur tem dang rasaa ashi.

Iba anogo nükjidong ya tar nung parasitic worms aliba ajemdaksütsü mechi tanur aser teinlonglong tem tepok nung mesen tepsettsü asoshi lir ta lai ashi.

Iba sentong nung Office of the Chief Medical Officer, Mokokchung nungi RBSK team ajanga school tanur ajunga nem Albendazole tablet agüja liasü.

Iba sentong ya Dr. Suimzenla, MO (Ayush) aser Dr. Arenkaba MO (Ayush) nati anir RBSK team Mokokchung ajanga agia liasü.

Kohima nunga National Health Mission (NHM) kübok Office of the Chief Medical, Kohima ajanga Government High School, Forest colony

Kohima nung National De-worming Day ya February 10, 2025 nü Dr. Khrievilhou Nakhro DPO (RCH/UIP) ajanga agia liasü.

Iba sentong nung DPM Avikali Jakhalu menden liasü aser Asst. Headmistress Swedesunuo Zao-i pela agizükba o jemi.

NDD tenzüker mapang DPO (RMNCAH+N) Dr. Khrievilhou Nakhro-i ashiba agi, tar nung mesen aliba ajanga Anemia, nutritional impairment, chiyongtsü mechi-mejmnüi akumba, tashi meiti akumba, tepok angoba, mangmangba, saksü-pokshiba aser tepok indokdang azü dener aoba timtem ajurur.

National De-worming Day nung mesen tepsetba mozü angati Schools aser Anganwadi Centres tem nung tanur arishi küm 1-19 tsüngta alir nem agütsütsü, ta pai ashi.

Tanur temang anema liaka iba mozü agitsü nüngdaker, ta pai ashi.

Kasa sentong nung DPO ajangasa tanurtem tar nung mesen tepsetba ajanga temang nung tajangzüker anguba indang lemsatepa liasü.

MO (RBSK) Dr. Nikdirenla Lusang-i school nung teka shidoktsü mera trok sayua liasü aser Dr. Katila Longchar, MO (RBSK) ajanga melepzüng o jembia liasü.

INDIA teloktep nung lenirtem melongjemteter

New Delhi, February 10 (Agencies): Opposition INDIA teloktep nung timtem maneni adoka Hombarnü iba teloktep nung densema aliba Trinamool Congress aser Shiv Sena (UBT) ama party temi melung masüba olen jembi tenzükogo.

Tawa Maharashtra aser Delhi assembly elections nung tamakok anguba ajanga INDIA teloktep ano tashimaitba akümba jungkai adokogo, kechiyong state elections nung BJP anema longjemer tokteptsü party temi memelunger.

INDIA teloktep nung densema aliba chief minister tem nungi tenzuka MP tem aser lenirtemi iba teloktep inyakyim agi melung masüba atema ola adok tenzükogo.

Delhi assembly election nung INDIA teloktep nung züngsem party temi peipei sasep nung toktepa tamakok anguba sülen Jammu & Kashmir chief minister Omar Abdullah-i X ajanga, "Kati ka anema maneni toktepan," ta metetdaksü. INDIA teloktep longjema

lir asü?, ta asüngdangba langzüdang Abdullah-i, "Senden ka tama mendi, iba sülen ang ni telangzüba agütsüdi," ta ashi.

Trinamool Congress tongti lenir aser West Bengal chief minister, Mamata Banerjee-ia, West Bengal nung takok angutsü atema ozü party-i Congress mesüra INDIA teloktep nung densema aliba party tem menügdaker, ta shiogo.

Mamata-i, "Onok kijai two-third majority ngua sorkar akümtsü. Yangi Congress kecha mali. Onok kijai takok angutsü," ta ashi.

Maharashtra nunga Shiv Sena (UBT)-i INDIA teloktep nung telongjem maliba atema melung masüba olen ka lemsatepogo.

Hombarnü Shiv Sena (UBT)-i, "Delhi aser Maharashtra nung opposition party tem tsüngda telongjem maliba ajanga BJP nem takok ngudaktsüba nung yarisemogo. Delhi nung AAP aser Congress

tsüngda kati ka jenjang raksatsütsü atema toktep, aser ibaji ajanga BJP-i melamela takok angu. Yamaji dang süra kechiba teloktep tentettsü? Nenok melung süa toktepan, nenok tsüngda maneni toktepan," ta metetdaksü.

Parnokisa, INDIA teloktep ya Parliament telung nung ang lir, ibaji ajanga atangji nungbo tamakok angur, ta metetdaksü.

Tawa Delhi Assembly election nung BJP-i menden 48 nung takok angu, AAP-i menden 22 nung takok angu aser Congress-ibo menden kata mangu. Delhi elections atema nüboyim tenzükba mapang nungi INDIA teloktep nung densema aliba AAP aser Congress na tsüngda aitsütep tenzuka liasü.

Congress MP, Manickam Tagore-ibo, INDIA teloktep ya 2024 Lok Sabha election atema tentetba lir, anungji assembly elections nungbo state sasep nung lokteptsü akok, ta ashi.

Censusmagibaagi nütsüng cr.14-i teyari mangur: Sonia

New Delhi, February 10 (Agencies): Hombarnü Congress lenir Sonia Gandhi-i sorkar dang tekeraba nung linük nung nütsüng züngdangba maparen 'census' tenzüktsü mepishi.

Laisa, census magiba ajanga linük nung nütsüng crore 14-ibo food security ozüng kübok tajangzük/teyari mangur, ta ashi.

Hombarnü Rajya Sabha nung Zero Hour mapang jembidang Sonia Gandhi-i, National Food Security Act (NFSA) kübok tajangzük angutsüpurtemji tang aliba nütsüng sasep nung masü saka 2011 Census nung ajemdaker jangjar, ta metetdaksü.

Laisa, 2013 küm UPA

sorkari benokba NFSA ya linük nung nütsüng crore 140 nem chiyungtsü security agütsütsü nükjidong nung benokba lir, ta ashi.

Iba ozüng ya ajanga nütsüng million aika, talisa coronavirus wara mapang nung nütsüng aika kümzükogo, ta laisa metetdaksü.

Iba Act kübok beneficiaries ji tang tashi 2011 Census nung ajemdaker jangjar, ajisüaka iba census agiba sülen joko küm 10 dak tali jungogo, ta lai ashi.

National Food Security Act, 2013 ya ajanga yimtsüngtem nung nütsüng shilem 75 aser jila/yimtitem nung nütsüng shilem 50 ayimjema Targeted Public Distribution System

(TPDS) kübok jenjang dalang agi jang agütsür. 2011 Census apibo ibaji nütsüng shilem 81.35 lir.

"India nunger nüchiso anguba sülen tang mezüng küm 10 shia agiba census küm pezü agi menoa magir. Census 2021 küm agitsü liasü saka magi, aser kadang agitsüar tang tashi mejangja. Budget nung sen lemozüksüba apibo takümbosa census magitsü," ta lai ashi.

"Census menoa magiba agi temsüa alir India nunger crore 14-i NFSA kübok teyari mangur, anungji tekeraba nung census agitsüla. Food security ya maongka masü saka temeden ka lir," ta Sonia Gendhi-isa metetdaksü.

M Modi-i France aser US na semdangtsü apusoa ogo



February 10, 2025 nü Ato kilonser, Narendra Modi New Delhi nungi tayimtsü ajanga France yimtiba, Paris-i apusoa aotsü jakdang tangokba noksa nung angur.

New Delhi, Tsüklai/February 10 (Agencies): Ato kilonser Narendra Modi-i France aser United States na semdangtsü atema Hombarnü New Delhi nungi apusoa ogo; taküm küm tenzük tang mezüng pai bendang li semdang.

France Tir Emmanuel Macron aser US Tir Donald Trump nati jaokba nung ajemdaker pai linük anaji semdang. Ato kilonser Modi-i February 10 nungi February 12 tashi France semdangtsü, iba sülen pai US anogo ananü semdangtsü.

France yimtiba, Paris nung Modi aser France Tir Macron na leniba nung 3buba AI Action

summit amentsü. AI Action Summit nung alima nung lenirtem aser tech CEO temi nüburtem ajak ajanzüksüsa AI technology amshitsü asoshi shisa lemsateptsü.

Marseille nung Ato kilonser Modi-i mezügbuba Indian consulate semzüksütsü. France semdangba mapang nungsa Modi aser Macron nati India-France asalentong partnership atema 2047 Horizon Roadmap reprangshitsü.

France nung anogo asemnü amongba sülen Modi US-i aotsü aser yangji Tir Donald Trump ajurua senden amentsü. Lenir anati India aser US na tsüngda Comprehensive Global Strategic

Delhi CM ji BJP Central lenirtemi shimtsü: Virendra Sachdeva



New Delhi, February 10 (Agencies): Delhi assembly election nung BJP-i menden 48 tashi nung takok anguba sülen kobi melii sorkar akümtsü, ajisüaka tang tashi BJP nungi Chief Minister ji shiba asütsüar mejangja.

Delhi assembly election atema nüboyimba mapang nung BJP-i Chief Minister candidate tenüng mesangdongi liasü.

Delhi BJP Tir, Virendra Sachdeva-i, Ato kilonser Narendra Modi aser Union Home Minister Amit Shah na densema central lenirtemi Chief Minister menden atema telemtetba agitsü, ta metetdaksüogo.

1993 küm nungi 1998 küm tashi nung Delhi nung BJP nungi Chief Minister asemben melentepa liasü aser tesüsabuba BJP Chief Minister ji asür, Sushma Swaraj liasü.

Virendra Sachdeva densema BJP nungi takok angur candidate tem telok katia

Delhi Lieutenant Governor (L-G) VK Saxena ajuruogo.

Osang angazükba agi, Delhi CM shimba nungji kin ajanga shilem tulu agitsü. Tan hopta nungsa CM den Deputy CM, Delhi Assembly Speaker aser cabinet minister tenet shimtsü.

Delhi nung BJP-i takok angutsüsa party nungitba kintem rongnung Brahmins, Jats, Punjabis aser tetsürtem lir.

Chief Minister menden atema Jat lenir Parvesh Verma shimtsüa akok, ta aikati bilemer. Verma-i New Delhi menden nung taoba mapang Chief Minister aser AAP tongti, Arvind Kejriwal madak takok ngua liasü. CM menden atema North-East Delhi MP, Manoj Tiwari-a shimtsüa akok; pa ya Purvanchali kin nungi tongti lenir ka lir.

Ano CM menden atema temsüa alir kaji Shikha Roy lir. Pai Greater Kailash constituency nungi toktepa AAP lenir Saurabh Bharadwaj madak takok ngua liasü.



February 10, 2025 nü New Delhi nung AIADMK party office tasen semzükba sentong nung Rajya Sabha MP, M Thambidurai den AIADMK lenirtem tangokba noksa nung angur



TIR YIMYIM YIMOBILEM (EDITORIAL)

DIMAPUR SANGTENNÜ, FEBRUARY (TSÜKLAI) 11, 2025

Government-i yazür !

Nagaland nung nübortem ajak asoshi osang tajung kaji, government mapa nung alirtem dang masü saka makamaiter nübortem ajak shilumanem atalokba mapang mozü kidang angati teyari angutsüsa Ayushman Bharat Pradhan Mantri Jan Arogya Yojana (PMJAY) aser Chief Minister's Health Insurance Scheme (CMHIS) state government-i tenzüksüba ya liasü. Aji oda, tang tashi nung nisung aika iba teyari sentong ana ajanga mozü ki tajung nung angati teyari agia taneptsü nguogo. Ajisüaka, Nagaland government-i nangzükba ama private mozü kidang shirangertem PMJAY aser CMHIS sentong ajanga yarirtem dak endokba senotsü meyipa magütsüba agi Nagaland Private Doctors' Association (NPDA)-i joko February 15, 2025 nungibo PMJAY aser CMHIS sentong dak temulung lemerbo shirangertem meyaritetsü ta metetdaksüba dang masü saka item sentong ketdangsertem Nagaland Health Protection Society dang yimjak nung taidok meshitsüla ta akangba jagi Nagaland government-i PMJAY aser CMHIS tenüng nung shirangertem dang sen memeshii yaritsü atema shimtetba private mozü kitem dang yazü jembia ashioktsüogo ta angateter. Atangji, PMJAY yabo Nagaland nung dang masü saka state ajak nung shirangertem nem teyari agütsüba sentong ka lir. Iba sentong ya Ranchi, Jharkhand nung 2018 küm September 23 nü ato kilonser Narendra Modii tenzüksü. Iba PMJAY sentong ajanga shilumanem atalokdang kibong kati sen lakh pungo tashi indang teyari mozü kidang nungi agiteter. Aji oda, iba sentong ajanga teyari agütsütsüba center aser state na prongla pei pei shilem lateta lir, anungji khurtet tulukabo masütsüba ser nung Nagaland nungbo iba sentonga dena takok ngua meinyaktetsüsa akümbaji state government-i mozü kitemji dang masü saka nübortem ashioktsür asütsü. Atangji, PMJAY aser CMHIS na ya külem ser repteper aoer, anungji iba sentong ajanga government mapa nung teinyakdakertem aser pensionertem asoshiibo küm nung sen lakh 20 tashi indangbo mozü kidang pei sen meindoki item 'Health Insurance Scheme' ajanga anepalutsütsü akoker. Aji oda, 'Insurance' tetezü timtem aser nungdak nung yaritsü nangzükba mapa ka ser nung, nangzükba ama mozü kidang shirangertem yariba indang sen magütsüabajii government asoshi tamakok dang masü saka maksü tulu lir. Alima nung yimten aser arogo tentetba ya nübortem tiyazü aser ochimashi mapa nungi anitettsü asoshi tentetba lir, ajisüaka yimteni nübortem dang nangzükba mataloktsütetra aser arogo nung ochishia meinyaktetra, nübortem asoshi ochi aser shitakba teyari kong nungi angutsü ? Nagaland ya ki ka asübo khen ajunga bendoker tasen kuma yanglushi nungang ki mesüka yanglur, yangji alitsü purtem anisüngzüka tipdema lila, kechiyong tang aliba Nagaland nung yabo shibai yimsü asür aser shibai rakzükratemer memeteti kümogo. Kasaji, tang aliba Nagaland nung yabo Nagaland shibai anüker aser Nagaland nung shibai auyar-ar mejangjateti kümogo. Aji oda, tang aliba Nagaland nung yabo shibabo India government tenzüka ita sen chia alir aser shibabo shitakba Naga yimten nüchiso asoshi rara-ar mebendangtetsüsa temangmangtsüka kümogo. Kasaji, tang aliba Nagaland ajungtsü atema shibaibo anepalur aser shibaibo Nagaland atema lemozükbatem pei meyong kümer agiadok-ar meshitetka kümogo. Aji oda, Nagaland nung kibong shia asoshi tashidak tulu agi tonger kodamasü timtem ajurudang yaritsü asoshi sen agütsütsü ta nangzükba tenangzükba to kongali (?) aser iba tenangzükba mapa kuma inyaktsü asoshi bendenba sen agi kechi akümar, aji state government-i nübortem nem metetdaksütsüla, kechiyong ibaji nübortem indang, anungji parnoki metettsü tim. Aji oda, NPDA-i mepelaba metetdaksüba amaji, CMHIS nungi shirangertem yariba sen mozü kitem nem magütsütetba kuliji mozü kitem nung ochimashi inyakba kuli kija agibo magütsütet masütsüla. Atangji, nisungi inyaker asünungji, temulung melemtetsüsa inyaka alitsüa akok, anungji ajia bushisüngdangtsüla saka iba kuliji tamtsü ser mozü kitem nungi endokba sen magütsüi soita yura, iba jagibo government memetener, anungji tadok meshir sen tagütsütsü alibaji agütsütsüla.

OLEMSABANG

AJAK PEI NÜNGTEM CHICHIBA NUNG LIDI

~ Molungkimong Literature Board

Yashi adok nungi...

"Yim tasen kuma aoba otsü ya An chanu tera taintemi bo ajaki meteta lir" ('Na-a Liang Tangar-a Lidakjang') ta zülua aliba nung ya ken-o talang aika lir asünung, tatsü agi ya dang ashir - Molungkimong yimdak atalokba otsü tangar-i jungjunga memetet. Yim tasen kuma aoba anogo nung Mary Mead Clark (A Corner in India tezülur), Naga lima nung maliasü, anungji yim tasen akümba mapang tatalokba lai mangu. Anungji ya, tangari ashiba otsü züluba dang. Aji-a Molungyimsen nung-i tebuba Dr. Clark dang ashiba-a ta züluba. "Mr. Clark, in view of the circumstances, advised a return to the home village, there to stand up for Christ and their rights, spiritual and temporal. 'No' came the reply. We will never go back to so bad a rule and such vexatious persecution" (A Corner in India. p. 23) (Trl. 'Clark-i parnok tendak/tiaji asadanger, parnok ki yim-i meyipa oa, yangji shi aser tanüla nung Khrista aser pei nüngtem asoshi nokdaksü ashi, saka 'Mah' ta langzü. 'Yimsüsübaren tamajung aser rishikangshi tamajung yamala aliba to akibo onok kodanga meyipa maotsü'). Molungyimsen yim akumba otsü jembidang aser züludang nisung aikati A Corner in India nungi ojang ka ("Persecute") ji dang angu ama zülua jembir. Yamaji nisung aikati iba ojang nungji semloka, rishikangshiba aser meindokba indang jembiba aser züluba angur. Molungkimong nung baptibapur shibasa rishikangshi aser meindok aser shibai yamaji inyak, Dr. Clark-ia mangu aser kuli kecha mali. October 24, 1876 (Molungyimsen Yimkümnü) - iba anogo talangba ka bo, yim tasen akümtsü-mekümdaksütsü ta asüba telok ana tatsühtepa ken-o talang jembir, nikongdang anü taolen ang tashi manga yim tasen akümi aoba ang molungzüng otsü tejangja lir. Parnok yim taseni aodang, kari sensamasatsü aser kar jeptep-a meinoktsüba otsü lir. Iba sülen jia takar Sütsungsangba Aier'er tsük küm piyong aben ta otsü tejangja lir. Asen tetsü tebu mapang rishikangshia meindok nung yamaji masütsü. Anungji "Persecute" ta zülua aliba ojang ya komala oren ka nung lir, aji züngzünga zünga angatetsüla.

Dr. Clark-ia tesülen bo yim tasen kuma aotsüba memela ('disapproved') ta pai Home Board nung Secretary, Dr. Rev. J.N. Murdock, dangi züluba shity nung shia lir. Dr. Clark shity nung-a 'Persecute' ta asüba ojang ji amshia lir (The Baptist Missionary Magazine, 1893, p. 402); saka aji-a pa Molungkimong doktsür külen züluba; anungji aji-a tangar-i ashiba züluba ta angateter. Dr. Clark Molungkimong nung lia pai tejangja ngua/angashia zülubaji ya dang - "The Haimong villagers had long been talking about a much better site for a village on their land. The land was deemed much more fertile and easy to cultivate than that about the old site. As most of the Christians and those favorable to Christianity were determined to go, I went with them" (Clark's Letter to Rev. J. N. Murdock, D. D, Dt, 21 March 1877. ABHS/Microfilm). Yangi - "determined to go" nung ya kechi angateter? Yim tasen akümi aotsüji 'temolungtetba' liasü, ta ashir, anungji yangi rishikangshi-a meindokba kecha mangateter. Yamai tangatetsü kuli tejangja aliyonga 'rishikangshi', 'meindok', 'anepdang yim tasen akümi ayi' ta aikati jembir. October 24, 1876 anogo, talangba ka yim tasen akümtsü-mekümdaksütsü ken-o atsühteper, nikongdang yim tasen akümi ao ta otsü tejangja aliba, 'anepdang yim tasen akümi ayi' ta otsü yanglushiner telok-a ka lir. Yang nungi-a angateter, tatalokba otsü aidoker, otsü tasen yanglushitsü taginüba lir.

Aikati mapang arshia kakat pongo-terok nungi oren aser ojang ishika refer süa jembir aser zülur. Ano aikati 'Document ngutetogo' mesüra 'Document nung ya lir' ta ajangajanga jembir. Yamala mapa ji nükpoker terok shiti (elephant) reprangba otsü amato dang asütsü. Asenok Naga nung-a joko Documentation Putu masü Research Putu nung alir. Tatsü aki, 'ya yangji zülua lir, aji yangi zülua lir, document ka nguogo' ta kisüng masü, 'yangi ya zülua lir, saka iba nung ya shia lir; iba lemtet ya bo lemtetshiogo; molungzüng otsü-i bo ya ashir' ta document sources balala puteputep aser tendak (context) meteta, shisadanga zülua-jembiba putu. Otsü tejangja bushir aser otsü shisashir temi metet, Naga tenem nung Arogo otsü tejangja angatetsü ya tasak. Kaketnang-sür-kaketnang züngzünga zünger ang medemdanga shisadanger ano molungzung otsü tejangja bushia, ajakji medemdangtepa bushi nung ang angateter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

UP nung Hindu nungertemi Dalit Khristan ka kanga reshikangshi



Shivbaran Paswan

February 10, 2025: Hopta ishika tejaklen Uttar Pradesh nung Hindu yimsü alia amangertemi Dalit Khristan ka kanga reshikangshiba sülen pa tang tashi kidangi meyipa mouteter.

Uttar Pradesh nung Fatehpur District kübok Bahlolpur Aelai yimdak Hindu yimsü alia amangertemi Dalit nunger Khristan, Shivbaran Paswan dak azük, kou ongdoktsü aser yimdong süa anir jaja liasü. Parnokisa pa tepsettsü amokmerena liasü.

Parnoki Shivbaran Paswan kangshia Hindu nunger tsüngremtem matsüngdang apudakdaktsü. Police-i pa jaokba sülen pai January 2 nü ki toktsür jena liasü aser tang tashi kidangi meyipa maruteter.

Circle Officer aser police station in-charge kati Paswan den pa kinüngtsü aser kiyonger Hindu nunger Shivpal nunger dang identification documents bener arung ta tuyua liasü.

Paswan-i, "Onok kangshia ghonda 3 tashi pua ayu aser ni shidi tazüing ka nung sign masü tashi onok mechioki liasü.

Parnoki kü dang, 'nai iba shidi nung sign mesüra na jail nung puoktsü aser ner ki raksatsütsü' ta ashi. Anungji ni parnoki ashiba angatsüsa aküm," ta ashi.

December 27, 2024 nü Hindu nunger telok kati, arrshi küm 46, Paswan-i tamangba yimsü meyipdaktsür ta tai tonglokja pa reshikangshia liasü.

Paswan-i, "Tangbo onoki nü dak azükba den kou dang ongdoktsür, ajisüaka nai osangtajung sayutsüngia jajara taruba nungbo onoki na tepsettsü," ta metetdaktsü.

Hindu nungertem jagi pa dak azükba mapang nung kiyonger Hindu nunger, Shivpal-i ibaji nokdangtsü merang aser pai lokti dang, nenok pa dang tejashiba lira police dang ang shiang saka pa dak tezük, ta ashi. Idangyongjisa lokti jagi Shivpal dak-a azük.

Paswan-i, "Ni Shivpal atema jashia bilemtsür, kechiyong pai ni kümzüksü merangba mapang nung pa-a kanga mejungi yiru," ta ashi.

Iba sülen lokti jagi Paswan ji anasa aliba Hindu nunger tekülem ki kati anir oa kou

ongdoktsü aser pa nem kangshia 'Jai Shri Ram' ta shidaktsü. Maneni parnoki pa tenütsü nung Hindu nunger temaitsü ajentsüba sülen yimdong süa anir jaja.

Lokti jagisa pa Hanuman tekülem ki kati anir ao aser kangshia süngyanglu matsüngdang apudakdaktsü aser Hanuman tenüing asangba ken kangshia tendaktsü.

Pa reshikangshiba mapang nungji yimdak tongti yimsüsüri Khaga police station dangi call asü saka call ji shingaia magizük.

Paswan-i, "Ni reshikangshirtemji police-ia pusema liasü. Hindu yimsü alia amangertemi police dang call kecha magizüktsü tuyua liasü," ta metetdaktsü.

Nikongdang 3:00 ako nung ang police station in-charge-i Paswan'er ki semdanga liasü.

Iba sülen Paswan den pa kinüngtsü aser kiyonger Shivpal nunger police station-i oa ken o benoka liasü.

Paswan-i, "Onok police station nung aliba mapang police kari ozü kidang Laishiba mesüra Khristan kaketterem densema kuli bushia liasü, ajisüaka parnoki kuli kecha mangu," ta ashi.

Police station tashi nunga Bajrang Dal züngsem kari parnok maneni amokmerena liasü.

Paswan ya tamalen südaker ka liasü. Ajisüaka 2002 küm pai Khristan yimsü agizükba sülenbo pai südakba mapaji toktsür Tsüngrem tenzüka wadang inyak tenzüka liasü.

Paswan-i, "Parnoki azükyonga mesüra amokmeren yonga ni Kibuba sülen maneni anidak. Ni Kibuba dak tamang akar aser Kibubai ni kümzüka arur. Ni tashi itshitsü aser ochi temeden angutsü atema sarasademjang," ta metetdaktsü.

ANOGO ABEN TSÜNGREM DEN

TEMENEN NANGZÜKBA AJANGA TEMESHIBA TAKÜM

"Asenoki asen temenen nangzükra, asenok dang temenentem adoktsü aser memeshiba ajak nungi asenok merükdaktsütsü, pa temulung lemtetba aser ochi lir" ~ 1 Yohan 1:9

Meimchiri Tsüngrem tsüngdang pei tai temenen nangzüka Tsüngrem den tesentaktep yanglushira Tsüngremi asenok nem taitok agütsür temeshiba taküm kümdaktsütsü iba lai tekong ajanga asenok dang Tsüngremi tenangzükba indang shia angur.

Iba lima nung shinga tabensaba mali, aser temeshiba metongteter. Meimchir ajak mokokmin agi dang sünga lirm, saka Tsüngremer taochi agi anogoshia asenok kümzüka ayur.

Alimar inyakyim reprangra nisung ka certified University ka ajanga Medical Doctorate certificate mali tashi Medical Doctor inyaktsü jenjang magütsütsü; saka asen tanela tsütsü Tsüngremer taochi putu nungbo yamaji masü. Asenoki dang Tsüngrem tsüngdang asen tai temenen nangzükra Pai asen kechisarena tai temenen ajak nungi tatok agüja temeshiba taküm jenjang agütsütsü mulunga dang lir.

Adianu, Tsüngrem tsüngdang asen tai temenen nangzüka Pa nungi temeshiba taküm alangzüker ka ka asütsü merangdi.

Pastor Ravi ministry ulushitsü atema ICC-i senotsü teyari agütsü



February 10, 2025: Tesüiba küm ana tsüngda Telangana nung Pastor Ravi indang ministry nung Tsüngremi mapa tulu inyakogo, ta International Christian Concern-i metetdaktsü.

Küm pezü tejaklen pai Telangana state tezülen aliba yim ka nung Arogo tasen ka tenzüka liasü. Tsüngrem dak tamang yur pai Hindu nunger kibong 300 aliba yim nungji tasü itta Khrista osangtajung sayutsüngi tenzüka liasü.

Tangbo iba Arogo nungji

tamanger 50 jungogo.

Arrshi küm 33 pastor Ravi-i tenzüka Arogoji Praise Temple Church lir.

Arogo nung tenla tera arubaji ajanga Pastor Ravi'er kibong nüngdak meperir. Tanurtem shisaliok atema-a senotsü peria maliasü, ajisüaka pai maneni tamang agi Tsüngrem wadang inyaker, ta ICC-i metetdaktsü.

Küm ana tejaklen International Christian Concern (ICC)-i Tenla ki anasaji dokan tilaka lapoktsü atema pastor kibong nem senotsü teyari agüja

liasü, aser ibaji ajanga tangbo pai tenzüka wadang nung timtem kangabo majangshir.

Pastor Ravi ya business administration nung post-graduate degree ngua lir. Tsüngrem pa sarasadem langzüa tangbo pai business tilaka repsema inyakba ajanga pai maneni sannükba mapa inyakteter, ta ICC-i metetdaktsü.

Pa business tenzüka sülen nungi pai anasa aliba yimtsüngtem nunga tekülem sentong ayongzüka agir aser tenzüka wadang ulushiogo.

India kübok yimtsüng aika nung pastor temi timtem tekangshi liaka aser senotsü peria meliaka Arogo tasen tenzüksütsü atema tejangraba tulu nung inyaker.

Hindu nütsüng teimba aliba yimtsüngtem nung Khrisata osangtajung lemsateptsü tejangraba aliba agi pastor temi shi nung timtem liaka Tsüngrem dak tamang yur tenzüker.

Alima nung baptiba shilem 15 agi tajemba kümogo

February 10, 2025: Tesüiba küm ishika tsüngda alima tesem ajaklen Arogoi baptitsüba kanga ajema kümogo; 2016 küm alima nung nisung million 16 baptia liasü saka 2022 küm nungbo nisung million 13 (13,327,037) dang bapti, ta osang ka ajanga metetdaktsü.

2016 küm alima tesem balala nung baptiba denji medemdangra tesüiba küm ishika tsüngda alima nung baptiba shilem 17 agi tajemba kümogo.

1991 küm alima nung nisung million 18.1 baptia liasü, 1998 küm nisung 91, 17,932,891 bapti aser 2000 küm nisung 18,408,076 baptia liasü.

2001 küm nungi 2016 küm tashi nung alima tesem balala nung küm shia baptibaji million 16 nungi million 18 tsüngda liasü, ajisüaka 2015 küm nungbo nisung million 16 den ishiba baptia liasü, ta kasa osang ajanga metetdaktsü.

2021 küm nunga nisung million 13.7 dang bapti aser 2022 küm nunga nisung 13,327,037 baptia liasü.

Fulani Islamic kiralongrartemi Khristan 16 tepset

February 10, 2025: February 2, 2025 anepdang Nigeria kübok Ebonyi state kübok yimtsüng ka Fulani Islamic teloki amak, aser iba tatalokba nungji Khristan 16 tepset aser ki aika rongdoktsü, ta International Christian Concern (ICC)-i metetdaktsü.

Fulani teloki khasetba Khristantemji The Lord Chosen Charismatic Revival Ministry nungi liasü.

Ebonyi State Governor, Francis Ogbonna Nwifuru-i iba tatalokba aitsüba den külemi Khristantem dang, security sepaitem yoktsü anungji tetsüba ta metetdaktsü.

Paisa, "Ozü nüburtem tesüngjem saka iba nungjagi ainertemi maongka magitsüla," ta ashi.

Amnesty International-ia sangdong ka ajanga Nigeria nung sorkar ketdangsertem dang Khristantem tepsetba aser kiojen raksatsüba tatalokbatem ya bushisüngdangtsüla, ta takhangba agütsü.

AO OSHI ANGAZÜKDAK:**TANÜ ANGAZÜKTSÜBA OJANG****Tejaklen**

(adv) tamalen (ahead, front)

* Lokti senden nung tejaklen amen tajungba.

Tejaksa

(n) ali aser glass agi yangluba osettem raksar aliba (broken things of glass and earthen materials)

*Lenmang nung glass tejaksa agi tetsüing yirur.



Tir Yimyim

OLONG PAITEP # 7061

1		2			3		4		5
				6		7			
8									
						9			
			10						
11									12
					13			14	
15									
16								17	

TIPIEN

1. Nüji masü
3. Technütsüka
7. Aketa shirangba
8. Pi
9. Amena
10. Kinü
11. Tanang masü
13. Lenmang
15. Nübo tedi
16. Tuoshi
17. Shiruru apuba temenatsü

-

(4)

-

(6)

-

(5)

-

(6)

-

(5)

-

(5)

-

(5)

-

(5)

-

(6)

-

(5)

-

(5)

-

(6)

LANGTSÜNGLEN

1. Jila tulu
2. Sarasademdang tembang
4. Tarutsü indang ashirtem
5. Alia
6. Mojing
9. Tai inyakba metet
10. Medemer chijiba
11. Tatokba / Amadok
12. Anügdang masü
14. Jabaso masü

-

(5)

-

(4)

-

(6)

-

(5)

-

(5)

-

(5)

-

(5)

-

(6)

-

(5)

-

(5)

-

(4)

OLONG PAITEP # 7060 TELANGZÜBA**TIPIEN :**

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüing,
10. Omen, 11. Lemta, 13. Ola,
14. Kin.

NAI-A YA METETTER MA

Viatina-19 ta ser nashi kati Guinness world record ka yangluogo. Minas Gerais, Brazil nung auction ka asüdang Rs. 40 crore agi yokdok. Viatina-19 temang touzükji seret 1,101 lir aser "most expensive cow ever sold" otsü yanglu.

Viatina-19-isa Champions of the World ta ser tetoktepba nung "Miss South America" takok nguteta liasü.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Meira Paibi kari sepaitem pusemer; kari village volunteers chioktsü akhanger**Imphal, February 10, 2025**

(Agencies): Thoubal kübok Kakmayai Village nung Meira Paibi temi mener lungkak aitba sentong ka agiogo.

Parnok yimtsüing nung mapa lemzüka aliba security forces ket nungi prangpong rakzüka bener aoba atema tetsürtemi lungkak ait.

Mejangjatetba nisung kari India Reserve Battalion aser Manipur Rifles indang prangpong 9 auya bener aoba atema Meira Paibi temi lungkak ait.

Parnokisa iba mapa inyaktertem dang tarutsü nung ibala tesempatsü mapa meinyaktsü shiogo.

Deobarnü mejangjatetba

nisung kar gari ka nung arur sepaitem ket nungi prangpong rakzüka bener ao ta Kakmayai Meira Paibi Secretary Th Aruna Devi-i ashi.

Kakmayai nung outpost nungi IRB aser Manipur Rifles nungi SLRs 6 aser AK rifles 3 auya bener ao.

Kuki yimtsüing anasa aliba Kakmayai nungeri mepetmesü tulu adokdang yim toktsür jena ao. Ajsüiaka, parnok yimtsüing nung security forces mapa lemzüksüba sülen tanaben yimtsüing meyipa arur alir ta ketdangsürtemi ashi.

12 buba Manipur Legislative Assembly indang session 7 buba tenzüksü lia police aser security

forces-i Imphal East aser Imphal West district temi security maparen inyaka liasü.

Idangji central aser state forces külem telok kati village volunteers 6 den prangpong trok apu.

Imphal East district kübok Tellou nung Deobarnep 1:00 ako nungi intensive aser extensive operation agidang parnok apu.

"Nisungtem den prangpong ajak mejangjatetba tesem ka nung ayu" ta Tellou Meira Paibi Secretary Thangjam Ongbi Chandani Devi-i ashi.

Tellou nung tetsürtemi ken o kecha melii village volunteers chioktsü aser prangpongtem Meira Paibi ket nung agütsütsü takhangba agütsüogo.

Tripura: Manipur nunger kati prangpong-injang shibelenba atema apu**Agartala, February 10, 2025**

(Agencies): Tripura kübok Shingicherra nung Customs Division ketdangsürtemi Manipur nunger ka ket nung prangpong-injang bena aliba apu.

Iba nisung yagi prangpong-injangji Bangladesh-i bener aotsüba merang ta osang angazüker.

Manipur nungi nisung ka arms aser narcotics smuggling indang trans-border syndicate nung shilem agir ka Lumding nungi Agartala-i aruba osang Customs Division, Agartala

ajanga angazük ta Tripura Police-i ashi.

Iba nisung ya Lumding nungi Guwahati-Agartala Special train nung mener aru. Pai prangpong-injangji kong yutsütsüar memetet agi Customs Division, Agartala-i pa sülen anidak.

Teliamura Customs Preventive Force aser Divisional Preventive Force, Agartala ketdangsürtemi ghonda ishika pa sülen anidakba sülen Border Post Shingicherra, Khowai nung apu.

Pai Khowai nung Indo-Bangladesh arrtsü ajanga prangpong-injang bener aotsü merang ta police-i ashi.

Pa ket nung Russian, US, aser Indian make pistol (.32mm) pezü den .32mm injang round 150 aser magazines pungu bena lia apu.

"Customs Act, 1962 nung ajemdaker ken o ka benokogo. Iba nisung Chief Judicial Magistrate, Khowai tsüingdangi anir ao aser pa police ket nung ayutsü temelaba agütsüogo" ta Tripura Police-isa metetdaksü.

Assam nung principal kati merenshiba sülen kaketshir ka soset**Guwahati, February 10, 2025**

(Agencies): North Lakhimpur kübok Kadam nung school principal kati jashidaksüba sülen Class IX kaketshir ka soset.

Little Flower English School, Joyrampur nung kaketshir Sonmoni Bhuyan-i hostel nung teburtem dang ola kanga madoktsü ashiba atema Principal Palash Koch-i la züka merenshi.

Iba mapang la kanga mejungi yiru aser mezüing local

pharmacy kati anir ao aser iba sülen Gogamukh nung mozüki kati belen. Lar guardian Bhagyawati Bhuyan-i la Kadam nung kidangi anir ao.

February 4, 2025 nü Principal Koch-i Sonmoni lar kidang semdang aser iba sülen tasüingji la soseta asü.

Sonmoni'er guardian-i Bogenadi Police Station nung FIR ka benok aser idakji principal-i züka merenshiba

aser timtem agütsüba ajanga la asü ta zülua liasü.

Principal-i WhatsApp chat ka nung pai tai inyakba nangzükogo ajisüaka FIR benokba sülen pa jena ogo aser police-i bushitepdar.

Iba lendong ajanga Lakhimpur aser Dhemaji nung nübortem jashir aser private residential schools nung kaketshirtem lendong nung alir ama tebilemtsü adokogo.



Polo, Shillong nung aliba Jawaharlal Nehru Stadium nung mezüing atema Indian Super League (ISL) match nung Meghalaya Chief Minister Conrad K. Sangma-i asayartem den salemdang agiba noksa ka angur. Iba asaya ya nisung 14,300 temai repring aser NorthEast United FC o Mumbai City FC tsüingda asayadang Mumbai-i takok angu.

Gaza alizüktsü atema United States temulungtetba nung lir: Trump

Washington, Tsüklai/February 10 (Agencies): United States Tir Donald Trump-i Gaza azoktsü tejangraba aliba lemsatepba maneni nenshia iba tesem alizüka US meyong kümdaktsütsü asoshi temulungtetba nung lir ta ashi.

Deobarnü Air Force One nungi osangbenertem den jembiba mapang Trump-i ashiba agi, Gaza ya "real estate" tesem tulu ka ama agitsüla aser iba tesem yanglushitsü atema Middle East nung danga linüktem nem nongloktsütsü akok.

"Iba tesem yanglushitsüba dak sendakba nung onoki Middle East nung aliba linüktem nem shilem kar yanglutsü atema nongloktsütsü akok mesüra onok tawabangba kübok dangari yanglutsü akok," ta Trump-i Super Bowl atema New Orleans-i mao tsüngda ashi.

"Iba tesem kibur akümtsü aser agitsü onok temulungtetba lir aser Hamas pur meyipa marudaktsütsü atema jenjang agitsü. Meyipa aotsü atema kecha anunga mali. Iba tesem ajunga ajasaogo," ta pai ashi.

Pai benokba onük ya Palestine nung representative aser linük balalai aijaka, pei ki toksür jenshia orr aliba Palestine nungertem timbai Gaza-i meyipa monütsü, ta Trump-i ashi.

"Asenoki teküzmükba tesem ka nung parnok nem ki agütsütetra ajungtsü, kechiyong parnok tanga lenmang kecha maliba agi Gaza-i aotsü asoshi jembir. Tanga lenmang dang lira parnoki Gaza-i meyipa moner," ta US tir yagi ashi.

Trump-i Deobarnü pa

tebilemba shidangba ya Gaza yimsü asüba Palestine nung telok Hamas-i aitsüogo aser pai jebizüka yokba olen ya tapet masü, ta shiogo.

"Gaza ya ayoktsü aser alizüktsü atema oset ka masü, aser iba ya Palestine nung litsü nung shilem ka lir," ta Hamas political bureau züngsem Izzat al-Risheq-i ashiba Telegram ajanga lemsatepa liasü.

"Real estate dealer ka tebilemdangba bener Palestine ken o bentettsü merangra kechi südir süaka tamakok angutsü," ta al-Risheq-i shilem

"Onok Palestine nungertemi displacement aser deportation sentong ajak nokdangtsü. Gaza ya pei nübur meyong lir."

Deobarnü Israel Ato Kiloner Benjamin Netanyahu-i, Trump-i benokba onük ya kanga tesangra aser iba ajanga temlenshi tulu bener arutsü ta shiogo.

Pa Washington, DC-i oa US tir den sensaksema sülen meyipa arur ghonda ishika lir cabinet senden ka amenba mapang iba olen ya lemsatepa liasü.

Gaza yaglushitsü atema sentong yangluba nung shilem ka ama Washington-i iba tesem ya agitsü atema Trump-i Mongolbarnü benokba ajanga Palestine nung aser alima kintem aoksadakja liasü.

Pai ashiba agi, iba ajanga iba tesem ya Middle East nung Riviera ka kümdaktsütsü.

Trump indang administration nungi ketdangsürtemi, tait süba tajemba kümdaktsütsü nükjidong nung, Palestine nungertem

kechi nung lidakja atadir ataka ajak ya khen atema dang asütsü ta ashiba sülen anogo ka lir US tir yagi tali mulungtetshir pa tebilemba lemsatepa liasü.

Trump ya yimden yimsüsüba nung shilem magi tsüngda real estate developer ka liasü aser pai benokba onük ya koda benoka inyaktsü iba indang osang karbo agütsüogo. Iba sentong ya benoka inyaktsü atema tetsükdaktsü aika adoktsü aser iba den legal aser ethical tebilemtsü aika adoktsü.

Mezüngbo Gaza-i US military yoktsü atema mulunga lir ta ashiba sülen, tatsüka lir Trump-i, iba sentong benoka inyaktsü atema America nung er sepai kecha menüngdaktsü ta ashi.

Trump-i Palestine nungertem ya humanitarian mulungsentsü tener aliba linüktem nung amenoka ali nung ajungtsü ta shiaka Egypt aser Jordan amala kidanger linüktemi pei ki toksür jenshia or aliba Palestine nungertem agizüktsü ayongzükb magizük.

Netanyahu-i Palestine state ka amenoktsü atema Saudi Arabia ali amshitsü benokba Saudi Arabia-i Deobarnü magizüki liasü.

"Palestine nungertem pei ali nung alitsü temeden lir aser parnok ya ali atsünga arurtem mesüra immigrants tem masü shirnok Israel-i mintoknüba mapang nung mintoktsüba masü," ta Ministry of Foreign Affairs-i ashi. Paisa, Gaza nung aibelen menaba dak meranglokdaktsütsü merangba atema Israel nung er lenirtem aija liasü.

Bangladesh nung nisung 1,300 dak tema puogo

Dhaka, Tsüklai/February 10 (Agencies): Bangladesh nung tesüiba anogo pezü tashi tesem ajungalen ki o jen raksatsüba mapang Deobar aonung "Operation Devil Hunt" tenzükb sülen security forces-i nisung 1,308 puogo aser interim government-i "temenen ajak" tera makepa meindok tashi maneni aputsü nangzüker.

Dhaka tezülen Awami League lenir ka indang raksatsüba mapang kaketshir activist tem yiruba sülen Chief Adviser Muhammad Yunus-i aniba interim governmentajanga "Operation Devil Hunt" ya Honibarnü sangdonga liasü.

Deobarnü Daily Star densema media outlets tulu temi ashiba agi, iba operation tenzüker ghonda 24 tsüngta army, police aser parnok indang specialised units lungjemer metropolitan yimtittem aser linük tesem balala nung nisung 274 apu.

"Linük tensa mejungi kumdaktsüner dak iba operation yagi tenük yoktsü aser temenen ajunga tera makepa meindok tashi alitsü," ta Home Affairs Adviser Lt Gen (Retd) Jahangir Alam Chowdhury-i ashi.

Dhaka tezülen Gazipur nung ato kilonser menden nungi atsüngdoker aliba Sheikh Hasina'er Awami League indang activist 81 apu, ta osang ajanga ashir, kong rongrong adokba ajanga ketdangsür temi Operation Devil Hunt tenzüksü totuyuba agütsü.

Hokulbar aonung taoba ato kilonser Sheikh Hasina'er Awami League party indang

maitsütem raksa indoktsütsü aodang Gazipur yimti kübok Dakshinkhan area nung amakdang nisung 14 yiru. Taoba Liberation War Affairs Minister Mozammel Haque indang ki amakdang iba lendong ya ajurua liasü.

Kaketshiri anir sorkar anema nokdaka Hasina'er sorkar atsüngdokba sülen senior ministers aser Awami League lenirtem aika pei ki yutsür bendang limai jena aortem rongnung Haque ya ka lir.

Hasina aser sorkar nung külemi tenzüker aika July ita sorkar anema longkak aiter azüoktsü asoshi tashiyim amshiba nung aija lir aser item longkak aiter yagi August 5, 2024 nung lar sorkar laodaktsü.

Arishi küm 77 tain Hasina ya Bangladesh yutsür jena oa India nung alir.

Anti-Discrimination Student Movement lenirtemi ashiba agi, parnok indang activist tem ya ex-minister kidang auyaba nokdangtsü asoshi ao saka mejangjaba nisungtemi meyiper amak.

Bodhbar aonung Hasina-i online ajanga jembiba sülen linük tesem ajunga nung rongrong tenzükb nung Hokulbarnü atalokba ya shilem ka lir.

Nisung lokti tulu adenshia ato kilonser menden nungi atsüngdoker alila bhukumer aser parnok ki aser business nung tenük yoker amak tenzü.

Longkak aiter temi Bangladesh linük ngutetsang Sheikh Mujibur Rahman'er ki nunga mi senloktsü. Iba kidang nungi pai 1971 küm linük nüchiso sangdonga liasü.

Libya nung leper ana nungi nisung tasü mang 50 jungnüa ngutet

Kufra, Tsüklai/February 10 (Agencies): Libya ketdangsür temi linük southeast tsütsü lisem lima nungi nisung tasü mang 50 jungnüa ngutet, aser ibai North Africa linük ajanga Europe atongtsü merangba nisungtem asüba tesüsaba alitsü.

Security directorate ajanga Deobarnü sangdong ka nung ashiba agi, Hokulbarnü southeast tsütsü Kufra yimti kübok farm ka nung leper ka nung nisung tasü mang 19 aliba ngutet.

Tasü mang ya autopsy atema

bener ogo.

Kufra nung aliba security chamber indang tekolak Mohamed al-Fadeil-i ashiba agi, ketdangsür temi yimti nung migrant detention centre ka meita aoba mapang tanabuba leper nung nisung tasü mang 30 shi ngutet.

Takum kumzüker temi iba tesem nung nisung 70 jungnüa arem ta ashir aser ketdangsür temi iba tesem nung tang tashi bushitar, ta paisa ashi.

Libya eastern aser southern tsütsü migrants aser refu-

gee tem yariba charity, Al-Abreen ajanga ashiba agi leper nungi ngutetba nisung ya karbo leper nung maremdang injang agi akhaba aser tepsetba liasü.

Asylum bushirtem tasü mang aliba leper tulu ya taoba mapanga Libya nung nguteta lir, koba Africa aser Middle East nungi Europe bushia aotsü asoshi adenshiba tesem ka lir.

Taoba küm ketdangsür temi linük yimtiba Tripoli south tsütsü Shuayrif region nung migrants 65 shi

tasü mang ngutet.

Küm ter dak tema tensa majungba ajanga nisung shibelener tem ajangzüka iba linük den arütsüa aliba Chad, Niger, Sudan, Egypt, Algeria aser Tunisia nungi migrants aser refugees tem shibelena arur.

Küm aika Libya nung asylum bushirtem tashiyim agi mapa inyakdaktsüba, züka


merenshiba aser tashiyim agi shi nung medemba densema yimya balala nung merenshia amshiba meimchir temeden asoshi nokdaker aser United Nations agency temi osangtem bendena arur.

Yamaji merenshiba den parnok shibelener indang rong tila nung linük nungi meyok dang tashiyim amshia sen meshitsü meranger.

ALI TAYOKTSÜ LIR

1. Old Showuba nung, 12397 Sqft. Four lane, fly over anasa.
2. Rs. 50 per Sqft. Aginüba tasazük angutsü.
3. (5 Pura) 1 Pura - 3,200,000/- Contact : 9863826159.

Sports Experts Advisory Panel nung Kom, Saina, Paes dena lir



Tsüklai/February 10, 2025

(Agencies): Asayartem bushiteta anitettsü, tebendang makai shimtsü aser international asayamungtem nung asayaba asayartem yimya aser coach tem asadanga atatsü asoshi sorkari Sports Minister Mansukh Mandaviya tekolak sür committee ka tentettsüogo, kong Olympic medalists asem densema lir.

Züngsem 17 agi kümtetba Sports Experts Advisory Committee nung nüngtugu boxer Mary Kom, nüngtugu tennis asayar Leander Paes aser badminton asayar Saina Nehwal nung densema lir, shirnoki Olympic nung medal nguogo.

Union Minister of State for Sports Raksha Khadse vice chairperson asütsü aser sports secretary/joint secretary convenor asütsü.

Committee nung sorkar ketdangsürtem aser asaya balala nungi anener aliba nüngtugu asayartem densema lir, ta Sports Ministry-i metetdaksü.

Committee nükjidongji training atema sub-junior aser junior jenjang nung

asayartem jangja-a parnok anitettsü atema ajungshitsü, tebendang makai shimtsü atema national athletes/teams shimba achaayangtsü, national camps mapang coaching facilities asadangtsü, India/foreign coach tem inyakyim asadanga tebilemba lemsateptsü aser national camper tem asayaba yimya asadangtsü asoshi lir.

Parnokisa international asayamung balala nung India team aser asayartem asadangtsü, asayartem tebilemstü NSF dangi abentsü, LTDP benoktsü atema SAI/NSF nem teyari agütsütsü, NSF systems dak sendakba nung sorkar nem osang agütsütsü aser parnok inyakyim ya India aser alima nung inyakyim tajungtibatem den jangyu medema kümdaktsütsü asoshi inyaktsü.

Committee nung tanga züngsemtemji Shiny Abraham (athletics), Heena Sidhu (shooting), Maj Gen VK Bhatt (rowing), Zafar Iqbal (hockey), PK Garg (sailing), Armando Colaco

(football), Ashok Kumar (wrestling), Bhanu Sachdeva (swimming), Parul Dansukhbhai Parmer (para badminton), CEO TOPS & Executive Director of Teams Division at the SAI nung lir.

Expert advisory committee nükjidong nung shilem ka ama sports expert panel ka tentettsüogo, kong asayar, coach aser ketdangsürtem densema lir.

Sports Expert Panel nunga züngsem 17 lir aser itemji Dola Banerjee (archery), Bhairavi Naik (cycling), Mohan Ukkrapandian (volleyball), Alka Tomar (wrestling), Shiv Singh (boxing), Ashwini Nachappa (athletics), Rani Rampal (hockey), Deepak Hooda (kabaddi), Vijender Singh (boxing), R Rajan (basketball), Saurav Ghoshal (squash), Cawas Billimoria (judo), Hansa Sharma (weightlifting), Devender Kumar Rathore (gymnastics), Debasish Biswas (mountain climbing), Rahul Choksi (mallakhamb) aser Rachna Sharma (athletics) nung lir.

Veteran Football Feb. 11 nungi Jalukie nung asayatsü

Dimapur, Tsüklai/February 10 (TYO): Nagaland Veteran Football Association (PDVFA)-i ayongzüka 12buba Nagaland Football Tournament Jalukie, Peren District nung February 11 nungi 14 tashi asayatsü.

Asayamung lapokba sentong nung Advisor for Youth Resources and Sports Govt. of Nagaland S Keoshu Yimkhiung alakteta jaoker asütsü aser February 14 nü asayamung shibangba sentong nung General Secretary Tenyimi Union Nagaland Dr. Tumda Newme tetushi tejaoker asütsü.

Taküm iba asayamung nung team troki shilem agiba angutsü, kong Kohima, Dimapur, Niuland, Mokokchung, Mon aser Peren Districts densema lir.

Asayamung nung takok anguba team, Runner up aser

Semi Finalists tem nem senpet sen 50000/-, 30000/- aser 10000/- (semi atonga tawabangka kübok Peren District Veteran Football Association (PDVFA)-i ayongzüka 12buba Nagaland Football Tournament Jalukie, Peren District nung February 11 nungi 14 tashi asayatsü.

Asayamung ayongzüka committee-i, asayamung nung shilem agitsü aliba team tem dang nikongtsütsü 4 ako tashi nungbo register asütsü mepeshia metetdaksüogo. Iba sülen 5 ako nungi tenzüka Team Coach & Manager Clinic agitsü.

Asayartem tanendak aser chiyongtsü ajak asayamung ayongertemi agütsütsü, kong talemstü sü dena agütsütsüba densema lir.

Kasa mapang nung asayamung nung shilem agitsüpurtem dang pei indang bedding aser tenüngdakba osettem bener arutsü metetdaksüogo.

Maneni Peren District Veteran football Association tejangrara ajak iba asayamung arua repringtsü pelashishia jaokogo.

Aston Villa-i Tottenham tsükdaktsüogo

Tsüklai/February 10, 2025

(Agencies): Deobarnü FA Cup round pezübuba nung Aston Villa-i goal 2-1 agi Tottenham Hotspur akokba sülen manager Ange Postecoglou tali nongshidar.

Asaya nung Villa atema Jacob Ramsey-i mezüngbuba goal idaktsü aser iba sülen asaya tanabuba shilem tom nung Morgan Rogers-i tanabuba goal idakja liasü. Tottenham atema Mathys Tel-i asaya tatemstü lia goal ka idaktsü saka kanga menoatoker liasü.

Brehostibarnü English League Cup semifinals nung Liverpool goal 4-0 agi makokba sülen Tottenham pur FA Cup nungia tuguogo.

Kasa asayamung nung Liverpool pur Championship team Plymouth Argyle-i goal 1-0 agi koka FA Cup nungi tuguogo.

Liverpool manager Arne Slot-i team nung asayar t a j u n g t e m anisüngzükdaktsüba ajanga

parnoki asaya makok. Plymouth atema Ryan Hardie-i asaya tanabuba shilem nung goal ka idaktsüba ya asaya akoktsü atem teperi liasü.

Miron Muslic-i aniba Plymouth team-i iba asayamung nung taoba round nunga Premier League club Brentford kokogo aser November ita sülen League nunga mezüngbuba asaya West Brom madak takok ngua liasü.

Maneni Wolves puri goal 2-0 agi Blackburn Rovers akokba sülen parnok round pongububai iogo. Asaya nung Joao Gomes aser Matheus Cunha nati goal kaka idakja liasü.

Liverpool aser Tottenham na FA Cup nungi tuguba sülen iba season asayamung pezü akoktsü timla aliba samaogo. Liverpool pur Premier League aser Champions League akoktsü atema ranloker asaytettsü, saka t a j u n g t e m Spurs purbo Europa League akoktsü dang maongka lir.

Ireland-i run 63 agi Zimbabwe kokogo

Tsüklai/February 10, 2025

(Agencies): Ireland aser Zimbabwe na Bulawayo nung Test ka asaya Ireland-i run 63 agi kokogo. Asaya nung Matthew Humphreys-i wicket tenet agiba ya par team asoshi kanga tongtibang liasü.

Pongunübuba asaya tenzükdang asaya akoktsü atema Zimbabwe-i run 109 nüngdaka liasü saka left-arm spinner Humphreys-i run pongu dang yangluba sülen Newman Nyamhuri out sütsü.

Iba sülen ano Wesley Madhevere-i run 84 yanglur aliba mapang Humphreys-i pa out sütsü aser iba ajanga Zimbabwe team kanga akoksa liasü.

Asaya akoktsü atema Zimbabwe team ano run 73

nüngdaka liasü saka parnoki run 10 dang bendenloker külen Richard Ngarava-i Andy McBrine out süja Ireland-i Test asemubaba atonga kokogo.

Humphreys-i tanabuba innings nung run 57 agütsür wicket 6 agiba ya Ireland nungi Test asayaba mapang pa asoshi tang tashi nung tajungtiba asayaba liasü.

Ireland-i taoba küm July ita a Belfast nung Zimbabwe kokogo. Abu Dhabi nung Afghanistan koka mezüngbuba Test akokba sülen ita pezü lir parnoki Zimbabwe koka liasü.

Iba Test asaya mezüngbuba anogo Ireland puri asaya junga metenzükteti run 31 dang yanglur asayar pongu out süatok, ajisüaka

McBrine-i out mesüi run 90 aser Mark Adair-i run 78 yangluba ajanga parnok asüngsashitsü atema teyari agütsü aser iba sülen parnoki asaya amokbanger asaya liasü.

"Humphreys-i kanga junga asayaogo aser McBrine-ia jung asayaogo. Ozü team bowler temi kanga meranga asayaogo aser mapang shitak nung wicket agia liasü," ta Ireland captain Andy Balbirnie-i ashi, shibai tanabuba innings nung run 66 yanglua liasü.

"Team ka ama onoki Test cricket meimer. Onok asayartem ODI aser Twenty20 cricket asaya-a anitet, saka parnoki iba asaya atema kanga junga renemogo," ta paisa shisem.

BILEMDANGANG

"Anogoshia tenüngsang agüja
tenzükanang."